



■ **Ilis participonts dil cuors cun Matthias Götsch (davostier) durant ina cuorta pausa. Il mir reconstruiri seprenta gia stupent.**

FOTO A. BEELI

Ils emprems meters dil mir ein pinai

A Schluein ha ina grupp d'interessents restaurau in mir schetg

■ **(anr/abc) Schluein ei ina vischnaunca che fa la punt, ella ei situada denter il territori turistic da Flem-Laax-Falera e tal da commerci e mistregn encunter Glion. Cun sia zona d'industria Isla dispona Schluein d'ina surfatscha atractiva da muntada regionala.** A Schluein dat ei denton era scazis zuppai che dattan perdetga dil mistregn d'antruras. Leutier s'audan ils mirs schetgs. Dacuort ha ina grupp d'interessents empriu da restaurar quels ed entschiet in project che selai veser – el ver senn dil plaid.

«Sche vus essas staunchels, fagei pingas pausas denteren. Quei gida vus da far megliera lavur e da finir quella pli spert»: Quei ei in dils numerus pigns cussegls che *Matthias Götsch* ha dau als participonts. Suentter treis gis han quels saviu veser il resultat da lur engaschi e selegrar giudlund. Duront treis gis ein els sededicai a Schluein ad in liung mir schetg. La fundaziun Platta Pussenta haveva organisau per l'emprema gada in cuors cull'intenziun da mantener quella substanza veglia che muossa la premura da nos perdavons

per cultura e pastiras. Gest a Schluein, nua ch'ils baruns de Mont da Löwenberg residiavan si el casti, deva ei giu el vitg inschignus mistergners. Tgei che quels han fatg va pli e pli en emblidanza. Aschia vegneva il liung mir schetg da Cleus tochen dacuort surcarchius pli e pli da mescal e caglias. El scurdava e sballunava ed ils viandonts fagevan strusch stem da quei object che gliued da Schluein haveva construui per sparter la via dil fons cultivau. Il mir da Cleus sparta la via da colligiazion encunter ils cuolms ed ina gronda cultura.

Matthias Götsch che habitescha a Vaduz e ch'ei sespecialisau sin mirs schetgs ha scolau ina grupp da sis persunas ella reconstruiziun da quels. El cuors da treis gis han ils participonts emplunau crappa cun sistem. All'entschatta han els denton udiu ch'ei vali la peina da sepreparar il meglier pusseivel sil project. Senza teoria va ei buca. Construui ni reconstruui in mir schetg ei cumbinau cun examinaziuns e lavurs preparativas. Quei vala per in mir niev sco era per la sanaziun d'in existent sco quel da Cleus giudem la Val da Schluein.

Ina experienscha ch'ils participonts han saviu far sez es ch'igl ei buca bien sche memia bia gliued lavura vid in toc mir. Matthias Götsch ha saviu instruir ina grupp da sis persunas, quei ch'ei stau ideal per quei project. Ils umens han empriu ch'igl ei indispensabel da construui pigl object in sempel palancau cun profil da corda. Ch'il mir sto vegnir stabilisau e tgei crappa ch'ei adattada e tgeinina buca han els medemamein saviu experimenter sez. La sanaziun dil mir schetg da Cleus a Schluein ei buca finida suenter treis gis. Tuts ein s'encurschi ch'igl ei necessari da cuntinuar, quei culla cundiziun che las autoritads ed ils proprietaris dil terren lubeschan ei. Als habitonts da Schluein e viandonts che vesan il resultat fa ei perinagada plascher d'entupar in tal object marcant ella cuntrada. La vischnaunca da Schluein ha dil reminent gest terminau la signalisaziun officiala dallas sendas da viandar ch'ella ha organisau en collaboraziun culla Cuminonza grischuna da sendas BAW. Il mir schetg a Cleus dat supplementarmein perdetga d'ina vischnaunca activa.

Preventiv quenta cun in gudogn

Il cussegl communal da Tujetsch tracta il preventiv 2015

■ **(anr/hh) Mesjanna proxima sefatschenta il cussegl da vischnaunca da Tujetsch dil preventiv pigl onn 2015. Il quen current preveda expensas totalas da struschamein 9,3 milliuns ed entradas da biebein 9,5 milliuns francs. Consequentamein duess resular in surpli d'entras da rodund 230 000 francs.** Il quen d'investiziuns preveda expensas da 6,5 milliuns francs. Las entradas sin fundament da contribuiziuns e subvenziuns muntan 274 000 francs. L'investiziun principala pertucca la realisaziun dalla nova halla plurivalenta a Sedrun/Dulezi. Per quei edifezi ha il suveran concediu igl uost passau in credit da 6,375 milliuns francs. Igl onn vegnent succedan la planisaziun e la realisaziun dall'emprema etappa. Medemamein eis ei previu da realisar l'auter onn ina emprema part dalla garascha sutterrana, medemamein a Sedrun/Dulezi. Ella ei ina part dil plan da formaziun che preveda leu differents baghetgs. In emprem – quel dalla Banca Cantunala Grischuna – ei realisau. La garascha sutterrana, calculada cun cuosts da quater milliuns francs, duei cumpensar la sperdita da parcadis in connex cun il baghetg niev dalla banca. Plinavon preveda la vischnaunca d'investar ella reorganisaziun dil santeri, la via d'uaul Camischolas, la cumpra d'ina maschina pil stradalesser e la casa da scola a Rueras. Leu duei vegnir

fatg ina midada d'intent per saver nezegiar ella sco camp da vacanzas.

Buna situaziun finanziaria

Sco quei che la suprastanza communal scriva en siu messadi per mauns dalla legislativa communal ei la situaziun finanziaria dalla vischnaunca favoreivla. La facultad administrativa ei pli u meins amortisada, ils deivets a miez e liung termin ein cun rodund tschun milliuns francs en ina rama supportabla. La liquiditad ei medemamein buna. En cumparegliazion cun ils onns passai sereduceschan las entradas, en emprema lingia sin fundament dalla fin dallas lavurs al plazzal digl Alp Transit. La suprastanza communal quenta egl avegnir cun in cash flow annual dad in miez entochen in milliun francs. Ils davos onns ha ella saviu nudar tals da mintgamai varga treis milliuns francs. «Muort la buna situaziun finanziaria actuala eis ei tonaton pusseivel da far las investziuns necessarias senza vegnir en pitgiras finanzialas», scriva l'executiva communal. Per quei motiv e sin fundament dil preventiv propona ella al cussegl da vischnaunca da laschar il pei da taglia d'entrada e da facultad pigl onn vegnent sin 95 pertschien dalla taglia sempla dil cantun. Il pei da taglia sin schischom duei restar sin 1,5 permelli. Il preventiv dil Bogn Sedrun quenta cun in deficit da 467 000 francs e quei tier expensas totalas da 975 000 francs.



■ **Il preventiv 2015 dalla vischnaunca da Tujetsch quenta cun in gudogn.**

FOTO H. HUONDER

Pro Sagogn – nova glied ella suprastanza

■ **(anr/abc) Dacuort ha l'unioni Pro Sagogn envidau commembras e commembers alla radunonza generala. Il president Luis Poltéra ha saviu selegrar d'in onn cun biaras activitads. El ha saviu beneventar dus novs consu-prastonts, quater havevan demissionau.** Porscher mintga meins in eveniment cultural, quei vul l'unioni culturala da Sagogn dapi 2006. Avon otg onns ha la Pro Sagogn surpriu ils statuts dil Cerchel cultural Sagogn ch'existeva dapi 1993. Dus dils fundaturs da quel, *Augustin Beeli* e *Pieder Caduff*, ein stai fideivels all'unioni duront tuts 21 onns ed han gidau a realisar las finamiras cun dar colur alla cultura dil vitg. A caschun dalla radunonza generala che ha giu liug l'jamna vargada ha il president dalla Pro Sagogn, *Luis Poltéra*, priu cumiau dils dus consu-prastonts e nominau els sco commembers d'honor. Alla radunonza generala havevan era *Cornelia Meyer-Cavelti* ed *Anna Helena Cavelti* demissionau suenter esser stadas divers onns ella suprastanza. En tut fagevan diesch persunas



■ **Il president da Pro Sagogn cun sia squadra motivada, da seniester a dretg, davontier Maria Mongili Darms, Luis Poltéra, Ingrid Meyer, enamiez Natascha Cavelti, Roland Derungs, Johann Cantieni, davostier Christian Buchli e Lucien Stern.**

MAD

part da quella, el futur eis ei aunc otg. La radunonza generala ha eligiu *Christian Buchli* e *Johann Cantieni* sco novs supra-stonts.

Il signet dalla Pro Sagogn cuntegn ils treis cavazzins «cultura», «economia» ed «ambient». Quels accentueschan ch'ins vul buca mo dar colur alla cultura, anzi, porscher activitads a favur dall'entira

cuminonza en fuorma da referats ed excursiuns. En connex cull'economia ha Pro Sagogn organisau la primavera vargada ina sentupada cul CEO dalla Grupp Arena Alva, *Reto Gurtner*. 120 persunas han demussau interess per quell'occurranza. La stad vargada ha il Kino Open Air Sagogn giu liug per la 16ava gada. Quei eveniment sa vegnir

organisau grazia a fideivels sponsurs, fatschentas e privats che sustegnan las finamiras da Pro Sagogn. Sco quei che Luis Poltéra ha rapportau ha l'unioni organisau igl onn vargau rodund 20 occurrenz. Denter quellas ein zacontas d'entadas tradiziun, cunzun pils affons dil vitg. Igl ei quei il ruclar ovs da gliendis Pastgas e la notg da raquens che

ha liug il secund vendergis dil november cun in'ura da prelecziuns en clavaus dil Vitg dado. Plinavon partecipescha Pro Sagogn dapi onns al marcu dil vitg ed ella organisescha las seras da troccas ina gada ad jamna. Uonn ha ella puspei envidau ad in'interessanta excursiun ornitologica entuorn il vitg. In cuncontrast tiel concert dils utschals ei il concert da rock staus che ha giu liug il fenadur sin plazcadruvi a Sutprei. Ina sera speciala da cumpignia ei mintgamai quella da «Wine & Dine» pils amaturis dils bus vins. Uonn ei la Frontscha stada el center. Plirs gis digl onn ha Pro Sagogn dedicau allas orchideas. Excursiuns e gis da lavur cumina han saviu sensibilisar hosps ed indigens per quels pigns scazis ch'ins entaupa ora ella natira. Cun gronda premura tgira il president Luis Poltéra era la pagina d'internet. Quella vegn actualisada gi per gi ed informescha la populaziun meglier che tut schellas paginas da Sagogn da quei che schabegia cuntinudamein el vitg.

reclama



USTRIA STEILA SIAT
081 925 19 19 www.ustriasteila.ch

reclama



Ilanzer Geschenkkarte
Freude schenken

Die kleine feine Geschenkkarte
in 20 Ilanzer Geschäften erhältlich